

天目先生集

天目先生集卷之九

吳興徐中行子與

七言律詩

曲靖道中大風簡胡督學

雄風遙自楚宮來，絕域浮雲一日開。
西海乍驚神女過，南溟爭覩大鵬廻。
金沙濤湧千江雪，銅鼓聲喧萬壑雷。
投簡祇今誰可賦，披襟宋玉在蘭臺。

初入金馬關憩歸化寺

關高關俯南荒兜率西來此道場天竺青浮
金馬色山茶紅奪火珠光驅車誰解塵容老隱
几方知佛日長縱住寰中勞物役不如徼外禮
空王

春日同三署諸公登太華山望昆明池

陰陰松柏隱香臺的的晴波萬頃迴僊掌遠從
西嶽出神池忽似上林開鏡中斜日搖金刹天
外飛霞送酒盃共憶樓船曾賜宴新詩不數漢
臣才

送按察張公還吳

十旬廉訪太匆匆萬里車輪易轉蓬
豈乏鄭莊推長者不令張翰待秋風
瘴鄉自喜生還早畏路從教宦術工
別後歸心那可奈煩君艤棹五湖東

程學憲遷貴陽大叅從蜀道歸省贈別

薦賢金馬滿公車賜履銅標竝客居
莫訝周南淹太史總緣父老借相如
波平巫峽堪廻棹花發潘園好御輿
傾蓋幾時仍賦別浮雲萬里重

躊躇

大中丞汪玉卿自鄖臺移鎮武昌寄呈二首

擁麾全楚主恩寬
總爲蒼生寵謝安
日月兩朝頻賜履
風雲七澤此登壇
江流橫絕東南盡
衡嶽高臨翼軫寒
却憶庾樓吟嘯夜
誰從叅佐奉清驪

鈞天一震洞庭陰
虎觀崢嶸白雪林
雲夢火明秋校獵
蘭臺風起晝披襟
浮湘司馬才名大
開

府羊公惠愛深，獨有夜郎羈客在。武溪煙雨自
悲吟。

恭賀楚王殿下駢生二子

大國誰從見寶符，武昌明月竝懸弧。秦庭不換
連城壁，梁苑空傳照乘珠。帝子自應龍作友，宮
人齊唱鳳將雛。合歡擬奏斯千頌，郢調猶慚楚
大夫。

巴蜀董太守守雲南三年奉法不阿，夙負
清彊之譽。計後凡四登除，目不報竟，擢河

東轉運使詩以慰之

滇南計吏出長安
疆項聲名異代看
曾是股肱徵季布
却因鹽鐵借桓寬
帷褰益部星辰動
帆渡黃河雨雪寒
自信驂駟終遇合
驅車休論太行難

夏日送鄱陽羅大叅汝符自滇南先期入
賀萬壽二首

五月南荒瘴癘偏
雙旌冒暑入朝天
樓船迴自三江下
玉帛翻當萬國先
近侍已賡玄鳥頌
殊

方堪奏白狼篇誰憐傲外孤臣在遙逐滇雲到
日邊

繡斧聲名八使前檐帷留滯百蠻天祇今萬里
呼嵩日還似三臺抗疏年龍袞新從黃屋覩文
星近傍紫薇懸爲言銅柱烽煙盡不用穿池習
戰船

送莫大叅子明自滇南遷閩憲兼呈何汝
肅中丞二首子明弟爲侍御

留滯昆明萬里餘除書欲盡下徵車自知拙宦

飛騰晚敢謂清朝記憶疎攬轡坐開滄海色餐
霞仍傍武夷居共看南斗雙龍合始信延津事
不虛

丁年建節下長安蜀棧滇雲路萬盤兄弟竝工
驄馬步清高偏稱惠文冠樓船秋擁風濤壯銅
柱天留日月寒多少芳蘅變蕭艾歲闌松柏古
今難

送駱給事購書還越

投荒暫向玉關迴惜別重登萬里臺禹穴好探

金簡去滇池寧爲碧雞來盤江明月千山出衡
嶽浮雲一日開漢室祇今饒雨露長沙況是賈
生才

奉賀大中丞阮公平南詩二章

公望雲霄萬里看時危一借惠文冠折衝誰似
戎機速舞羽遙知聖德寬父老再逢司馬檄西
南新築武侯壇旋聞銷甲綠農畝落日夷歌幾
處驩

七旬來格果如期片檄強於百萬師風壤依然

堯日月冠裳不改漢威儀黃金入塞克軍實白
雉乘春獻壽卮自昔羊公稱鎮靜至今峴首有
遺思

大理李公邀同周陳二憲使讌三塔寺梅
花園中

給苑春回玉樹高開尊忽似對江臯飛花寒映
蒼山雪吹笛風生洱海濤真氣偶從天外合禪
心聊向醉中逃一從杖屨登三竺却悔車塵老
二毛

雨中同陳僉憲看道旁奇石

道旁何意出崆峒
冒雨貪奇興復同
形類石鯨長吐霧
神如金馬欲鳴風
崆峒小有三山色
秀拔堪分五嶽雄
設使女媧當日見
千秋誰羨補天功

劉郡丞陳情乞歸

乍遠慈闈思不禁
中年滇海便抽簪
共知此日陳情疏
總是當年捧檄心
展驥府僚才不盡
攀轅父老望仍深
已聞漢詔旌賢母
節孝雙垂著

卷之二
六
三
作林

牂牁邵僉憲戶曹伯仲蔣禮部招游碧雲

洞

殊方何處有仙臺
載酒仍逢曼倩才
深壑長寒岷嶺雪
驚濤不斷海門雷
斗崖石迸蒼龍出
東壁天迎曉日開
更道雙鳬天外至
斜陽盃酒重徘徊

立秋前一日林憲副邀登玄通寺高頂

孤城雨過鬱蒼蒼
把酒憑高盡四荒
平地山浮

青玉案虛空塔湧白毫光
昆池落日來秋色北
極飛雲是帝鄉
去住祇今猶萬里
還如蘇李在
河梁

登岳陽樓

天敞平湖萬里臺
秋高霞色照行盃
三湘白日波間動
七澤青山鏡裏開
風靜仙人吹笛去
月明神女弄珠來
徘徊便擬休餐住
俗吏慚非曼倩才

九月六日穆水部邀登蕪湖吉祥寺作

上方樓閣倚江開，萬里帆檣破浪來。
正擬青山留對酒，况逢黃菊好登臺。
斗間自合豐城氣，白下誰同水部才。
九日未知何地醉，因君投轄重遲迴。

登善權洞

萬松深處隱招提，靈閼長開震澤西。
天厠吳碑埋草樹，雷書唐殿走虹霓。
地中飛瀑蛟龍出，雲裏重樓日月迷。
莫怪關門來紫氣，欲從石室問青泥。

得史少尹錢塘書却寄

尺書曾向碧雞開
憶爾重登金馬臺
客散廣陵無絕調
賦成招隱見清才
潮生北固應相憶
秋盡西湖且未迴
忽報赤城霞色動
知君早晚入天台

奉寄少師徐公

雲間樓閣鬱嵒嵒
靈氣巍然倚赤霄
口畫鴻猷扶九鼎
眼看全盛到三朝
山中宰相名逾大
海內神仙手可招
試閱滄桑應一笑
鷗鵬天外自

逍遙

潘中丞漕河東歸賦二首

銜恩翻喜謝波濤坐使安仁變二毛
投杼總知非帝意負薪誰不念臣勞
千秋禹績真難掩一日吳山轉自高
余亦倦游思解紱五湖久已屬吾曹

平生巖壑興偏濃揮手齊東日觀峯
治水鉤盤推禹績談天碣石讓詞宗
中山謗篋寧勞問上國軍儲已盡供
更道明君仍側席滄洲猶恐

未從容

登涿州浮屠瞻望京邑有懷黎惟敬

憑闌絕頂海天寬
三輔青山掌上看
寥廓浮雲開碣石
鬱蔥佳氣滿長安
向期就日瞻龍袞
便欲凌風借羽翰
獨有詞臣清禁裏
濡毫長得奉宸驩

奉答立春日黎惟敬見懷之作

共憶綈袍驛舍寒
招攜詞客賦春盤
誰知天上雙星隔
猶似滇南萬里看
懸榻經年情轉劇
迴

舟中夜興曾闌都門只尺猶如此何處平原十日驩

登岱

跌蕩天門日月開削成丹壁擁崔嵬河宗泰嶽
翻西遶山拱神京自北迴黯淡春陰收碣石霏
微佳氣接蓬萊更聞玉女三漿在願上君王萬
壽盃

東嶽崢嶸迴不羣中峯瑞靄更氤氳天門雪盡
河流合日觀春晴海色分風起秦松常似雨氣

蒸漢檢欲成雲千秋往事終銷歇猶說相如封
禪文

送觀察鄒公入覲時長公進士佐試北

畿仲子計偕

廿年燕市酒人空君去談天碣石宮世業自傳
楊氏雀都人猶識鮑家驄明堂元會諸侯集清
漢仙槎萬里通正值虞廷新輯瑞握中雙璧有
誰同

呈司寇晉江黃公二首公初令長興余從

諸生受易門下

幾年端委大明宮四海蒼生屬望同開府三湘
羊叔子講堂千載漢文翁車書欲盡觀風地社
稷長懸捧日功聞說聖明思舊劍延津龍氣
忽成虹

萬里春生綠野前兩朝誰似次公賢共知神武
抽簪日猶是平津奏對年地敞仙臺卿月迴天
迴帝座法星懸門牆最有侯芭少白首重來問
太玄

范中丞敬夫九日見懷兼憶燕市

游諸君二首

書來九日罷登臨望入三山動越吟
少伯自高浮海興巨卿寧負結交心
酒壚猶在河山邈隣笛重聞霜露深
獨有鑑湖秋色好還期乘雪到山陰

至今閩粵羽書飛范蠡功成遂拂衣
九日陶家秋色滿十年燕市酒人非
青山遮莫酬黃菊白髮那堪對紫薇
朋舊星稀君已見扁舟早晚季

鷹歸

送王鴻臚使閩還朝其先君按閩多得士
公門桃李徧天涯典客新乘白鼻騮島嶼煙中
俱屬國衣冠海上半通家彩纓百粵廻兵氣授
簡三山送彩霞更道遠游情不盡還期方外汎
仙槎

贈常德於太守二首

挂冠神武便歸耕推轂循良有大名借寇豈無
三伏闕報劉終自一陳情提戈忽見妖氛淨

枕猶令楚水清經術季長元不淺曳裾南郡滿
諸生

少年陳乞爲潘輿汝穎循良總未如譽起兼城
和氏璧功成一箭魯連書山多桂樹深招隱家
在桃源穩卜居自信丹砂堪世出不妨垂老混
樵漁

送叅知宋公調山東督漕一首時有海壇
之捷

捷書纔向未央開飛輓中原急異才百粵樓船

橫海出三江芻粟蔽天來不須壁馬投河伯且
喚金焦送酒盃共道歌中傳瓠子狂瀾千里一
時迴

明卿遷大梁余閩省俱叅藩除目同日下午
賦寄時明卿在夜郎而余頃亦自昆明內
徙

白髮薇垣改佩魚故人同日拜除書已甘鍛翮
三朝裏敢謂雄飛萬里餘豐劒忽看騰越水隋
珠終得照梁草相攜且赴彈冠會莫向湘沅賦

卜居

寄題匡南宗侯來爽臺

漢室王孫鄴下才
匡廬高倚讀書臺
雄風忽自披襟起
爽氣遙從拄笏來
池上芙蓉明染翰
園中脩竹覆銜盃
相攜更有浮丘伯
笙鶴翩翩江上迴

寄壽許諫議二首

丹陽許邁世仙家
暫入先朝扈翠華
庭下彩衣明玉樹
雪中新酒照梅花
山城落月仍投轄
水

國春生欲放槎念我曾分金掌露懷君聊寄幔
亭霞

自歸丘壑世頻移幽抱惟應靜者知執戟金門
隨曼倩浮舟震澤伴鴟夷三朝青瑣人安在萬
事滄洲酒一卮我亦倦游思脫屣煩君海上報
安期

輓太醫令周一之

綈袍已自十年分寶劔延陵擬贈君過虢驂驚
中庶子行邊獨拊大將軍神丹定自淮南得俠

氣曾從燕市聞更道遺孤能種楨佇看經術起
青雲

紫雲館爲史元乘題

先皇宸翰表清都潭上仙人跡有無自向煙霞
採玉笈何如仕宦執金吾赤城天外開雙闕匹
練窻前挂五湖從此東南來紫氣居然鍾阜接
蓬壺

送康裕卿還永嘉

朝看紫氣出燕關黃鵠翩翩不可扳婚嫁祇今

催白髮登臨何地不青山探書禹穴堪乘興采
藥天台足駐顏知我倦游思解綬春風攜手放
歌還

答李京兆于美

扁舟一繫漢江臯回首滇雲萬里勞酒伴偶從
燕市飲德星長傍帝城高風流仙令來鳬舄詞
賦名家有鳳毛聞道鳴琴多暇日平生白雪好
誰操

送黃太史 冊封唐藩

詞藻翩翩滿漢京
青春奉使出承明
遙將唐叔桐圭往
不爲梁園雪賦行
四牡都門歌別讌
三花大室逐前旌
周爰總是輜軒事
好采民風慰聖情

輓故臨淮侯盱山李公

漢家飛將大名齊
奕代風流邁隴西
賜履至今推呂望
選賢誰復似祁奚
輓曹萬里來芻粟
提劔三江靜鼓鼙
何必天山高起塚
路旁桃李自成蹊

題宋封君勅誥重輝卷

四十褒封水部郎三朝三命累銀黃鹿門隱操
齊龐德吳市清風復孟光五子遞過攜寶劒一
經世授出青箱最驪休沐頻歸省賜有黃金佐
壽觴

答沈純甫比部

計吏明堂集股肱儒臣朝下鬱雲蒸中原鞭弭
看重盡西省詞盟好代興帝座甃依星似客燕
京高會酒如澠海南贈我雙明月轉見寒光溢

五陵

贈闕西王丈

少年曾奉武皇歡
駿馬長繯意氣看
典客故諳科斗字
屬車先賜鷄鵲冠
狂來郢曲青雲動
老去吳鉤白日閒
我亦拂衣乘汎宅
過逢莫厭五湖寬

茗上送程太學還歙兼呈汪司馬

燕市相逢盃酒前
茗溪重繫孝廉船
稱詩北學無韓傳
吾道東歸有鄭玄
下榻清風生竹徑
揮

毫涼雨過梅天懷人欲寄豐城劒未夜徘徊望
斗邊

送梁右史之任荊藩

仙帆六月下瀟湘湯沐依然是帝鄉廉吏舊稱
孫相國詞臣今傳楚襄王郢中白雪千秋見臺
上雄風萬里長若道宗藩非得意馬卿何用客
游梁

壽大司徒馬公詩二首

三山海色曉蒼蒼臘盡春回綠野堂六月但知

鵬善息九霄誰測鳳高翔挂冠神武陶弘景擁
帳扶風馬季長明發遙聞占太史卿雲高望紫
薇傍

度支軍國漢庭勞武庫才名冠六曹四海蒼生
懷謝傅兩朝將母重山濤枕中紫氣來鴻寶庭
下春雲起鳳毛試看青門千載後風流誰竝二
疏高

七夕寄懷滇南李侍御先生

懷人萬里重徘徊紫氣滇關鬱未開問道前身

金粟佛論文當代碧雞才飛觴夜讌梅花圃授
簡朝登艷雪臺此夕乘槎吾所欲七襄安得報

章來

二塔寺有
艷雪臺

黃別駕同李德華姚弘道兩生過看牡丹
分韻得神字

芳園忽墮洛川神上客過逢賞讌新一觀名花
無衆色始知絕世有佳人酡顏暈日疑酣酒仙
佩凌風不染塵解語總然嘲白髮揮毫且自聞
陽春

庚申秋望王亮卿偕宣允則孫從周逕往
顧渚山拜余先公之墓乘舟便還而李德
華乃爲下榻多瑞軒中則錢子良傾紉禮
在焉因憶徂冬于德華雪月樓嘗一讌集
眷焉于懷遂各分韻賦七言律一首余得
樓字

日落圖書四壁幽芳蘭叢桂足淹留空山何意
酌徐斂明月還停訪戴舟露掌秋生遶伏枕彩
毫亂後賦登樓相逢豈厭淮南社知我當年已

倦遊

秋日同王元美兄弟游顧司寇西郊別墅
分得山吹二字是日招宴城居

僊臺寥廓白雲間
謝傳回來此閉關
斗下著書深紫氣
窻中飛瀑滿青山
薜蘿秋老堪裁服
松柏年多好駐顏
不是主人開閣待
高天日落詎能還

城臨箬水路逶迤
樓敞天風萬里吹
招隱偶依青桂樹
銜杯猶憶白雲司
秋高嵐翠沾衣袂
日

午松陰覆酒卮總是陳思門下客
還期明月共追隨

冬目大司寇顧簪羽招讌大雅堂賦詩見
示輒此奉和

中朝誰似顧長康
好客頻開綠野堂
節後黃花仍爛熳
老來白雪更飛揚
蚤聞滄海烽煙盡
轉覺青山日月長
從此定盟叢桂社
經秋已製芰荷裳

雪中陳庚老孫從周見訪卽席賦此

病起梅開忽滿枝客來飛雪劇催詩停舟剡水
傳今日授簡梁園憶往時天遠交游空自老歲
闌盃酒幾相知卽看動有經年別莫怪荅溪解
纜遲

天目先生集卷之九終

天目先生集卷之十

吳興徐中行子與 著

七言律詩

送張中丞肖甫還蜀

上書綠鬢爲慈幃改席依然在舊畿漢殿豈應
推轂少潘園翻喜奉輿歸自知吾黨青雲薄敢
謂人間白雪稀故業五湖原不惡已將蘿薜製
初衣

奉賀少師徐公元孫登第二首

象賢出自帝王師遇合明良又一時似爲金
滕思舊德爭看玉樹長新枝回天密語千秋見
定鼎深宮九廟知不信試看公輔後雲霄誰似
鳳毛奇

公家世業在文昌接武翩翩入建章兩見傳臚
雲五色一逢負展日重光論功不盡河山遠食
報堪同帶礪長倘念先朝舊師傅德星仍聚紫
薇傍

萬曆三年春正五日司寇葵峰七十初度

敬賦二首

功成一疏臥隆中推轂頻年滿漢宮
上几几歌赤舄都門藹藹慕清風
傳經關右逢楊震問政平原得蓋公
弟子平生關令尹長看紫氣滿空同

冀開五葉歲方新桃薦三山復幾春
一自素書傳孺子久知黃石是天人
蒼生轉切爲霖望真宰長扶報主身
况是漢庭仍好老龍門爭喜御蒲輪

客冬明卿自夜郎入梁賦寄

一官遙自夜郎移道人黃河雨雪遲羈宦異方
過瘴癘賜環萬里荷恩私采花少室尋仙地授
簡梁園憶舊時鄴下祇今吳質在月明何客好
追隨

明卿入梁奉寄灌甫宗正

當年解印去中原南徙偏銷萬里魂豈爲蒲桃
克使者翻緣叢桂憶王孫客來菟苑題新賦士
向夷門感舊恩鄴下故人星散盡好從李重一

開尊

同宋大叅邀方戶曹年兄靈山亭小集

廿年燕市邈山河千里誰能命駕過握手暮雲
停睥睨開尊秋露滴松蘿倦游轉覺青山好感
舊翻憐白髮多此日還如臨海嶠况逢和客有
羊何

李生瑞徵石谷少尹之孫也其父旣物遠
謁閩省賦此送之

負薪憔悴楚王孫三世通家僅爾存命駕每營

窮巷顧脫驂難報故人恩松楸寒食迷江口風
雨綈袍暗海門來往幾年耆舊盡因君分手倍
銷魂

陸憲副內弟吳生通軒岐家言余嘗館其
家茲爲憲副送家至閩過別賦贈

憶從舞象識吳郎回首塵塗三十霜忽擁青油
來檣李早傳丹訣自長桑歌當子夜年仍少夢
破丁年鬢已蒼舊館荒涼那可問一尊且醉幔
亭傍

爲嶺南周朝亮朝案二明府壽其貞母勞
孺人

北堂完壁凜冰清掌上雙珠合浦生自爾斷機
窮萬卷居然製錦照連城五雲遽見仙鳧起列
宿長依婺女明更問平反同雋母兩邦父老競
逢迎

僉憲石公以平南功進少叅寄賀

崇朝五嶺淨妖氛緩帶春風自不羣銅柱祇今
題馬援長纓何必借終軍元戎幕府行休戰

天子明堂坐策勳多少登壇文武士功成談笑
有如君

讀宋叅知題甘觀察江樓十六景詩病未
及和先賦此寄之

挂冠東嶽歲頻移起草西曹幾故知池上一篇
高白傳欄川諸詠敵王維滄洲明月過漁笛列
巖飛霞對酒卮舊業五湖差不惡扁舟真愧拂
衣遲

九曲泛舟二首

振衣秋色起巉岬萬壑千崖一棹過峯落鏡中
開洞府槎浮樹杪出天河境遺五嶽登封晚海
接三山秘檢多他日挂冠如此地扣舷處處好
高歌

扁舟載酒任逶迤路轉峯迴面面奇絕壑乍疑
塵世隔澄潭更與暮秋宜風吹簫管千山應瀑
挂藤蘿百尺垂十載武夷饒撫掌攀帷三過一
題詩

崇安朱明府邀宿天游

元龜集卷之二十一
三
檻外三峯列翠屏
武夷絕頂此明庭
溪通銀漢星辰濕
山倚高天日月停
尚有殘霞垂碧落
忽看孤隼破青冥
若非關尹占真氣
誰信東方是歲星

自廣川夜飲別道函垂二十年矣辱以不佞覽揆枉問感謝

雙旌一自廣川違
回首中原歲月非
蹭蹬三朝顏駟老
驅馳萬里仲升歸
雲深太室堪高臥
秋到東湖擬拂衣
同是欲栖緱嶺鶴
何年重向洛

濱飛

寄答明卿

憶自紅顏闕下逢飄零身世笑孤蹤頭顱漸逼
陶弘景官秩仍逾邴曼容一日星辰分五嶽十
年風雨滯雙龍吾衰久謝嚴廊夢揮手浮雲萬
事慵

王元美開府鄖襄五十初度

韶年絕學起勾吳五十班聯上大夫寡過自師
蘧伯玉匡時曾說管夷吾三臺驄馬雲霄出千

載詞盟日月扶副在衡山藏不盡驟看紙價貴
三都

席上送李文仲還吳興

三年臥閣少逢迎倒屣偏令四座驚海內自余
爲傲吏里中誰復問狂生持盃立就三山賦躡
屩遙從五嶽行握裏雙珠堪贈汝攜歸明月滿
蕪城

寄答元美

鄰下諸賢強半存曹家兄弟誼仍敦序年獨愧

苟卿老知己誰同鮑叔恩共取五湖供洛社已

開三徑傍吳門峴山詩句曾相許讓我賓筵第

一尊

元美題峴山有還應四十餘年後明壽堂中第二人之句

元美自郎臺拜留京廷尉賦贈

歲晚江南落日孤樓船千里到姑蘇殿中結襪

張廷尉臺上披襟宋大夫王氣忽高玄武署鉞

大猶振洞庭湖著成萬卷才難盡賈勇斐然賦

兩都

答敬美壽余之作

三朝舊侶漸凋零五十羞聞起一經已道滄桑
成惆悵獨存河嶽見英靈仲升旅鬢曾無黑子
敬寒氈尙自青不是弟兄勞問訊塵中誰識少
微星

敬美以尙寶使關中遂擢豫章少叅賦寄
絕傳星使發春明忽報江藩借大名紫氣函關
曾未別青山滕閣又相迎何妨尙璽三台出自
喜乘輅五嶽行從此雙龍堪比翼延津木自接
豐城

奉題中丞潘子良毗山讀書堂

柳惲臺高插斗墟安仁賦就興何如浮游且放
鴟夷棹疏鑿曾傳禹穴書莫怪客星辭帝座從
來仙侶好樓居明朝結社菰城畔不忝青山兩
鹿車

贈陳廷器

有序

廷器名良弼閩清人也以太學生需選
公車值世廟南巡抗疏諫止下詔
獄除名以余所聞薦紳訐朝政而太學

生爭慕其風未聞有首倡危言者也河
西廣成東都之諫雖亦以巡幸乎然皆
天子貴近臣非諸生列也漢劉唐何蕃宋
陳東于茲而四矣余私心慕之遂贈以
賦

千官扈從漢江行展禮山陵自聖情總爲扣
闥危萬乘却教止輦讓諸生精神不爲雷霆折
肝膽仍逢日月明世廟諫臣徵欲盡客星猶
復臥孤城

再泛九曲遂登天游峯

斗壁雙開澗道幽重攜賦客泛清秋
平移盤頂千峯立倒瀉銀河九折流
玉女飛來霞作障仙人臥處石爲樓
翩翩超覽天游盡更躡虹梯到上頭

送叅知楊公調大梁并簡吳明卿

楊吳俱楚人

登壇滄海已無波其奈中原借寇何
萬里戈船歸百粵九關芻粟轉三河
春生嵩少看花駐雪滿梁園載酒過
舊侶祇今吳質在相逢好和郢

中歌

謁宗子相祠

一出淮陽起大名
驟沉滄海氣難平
精靈豈爲三山出
詞賦寧忘五子盟
不盡風雷藏劒浦
有時煙雨夢蕪城
平生竹素還誰託
祠下年年草更生

九日登松風樓感懷宗子相

炎徼寒遲菊未開
漫因九日一銜杯
松濤忽逐秋風起
鶴鵲遙迎落照來
海繞三山連崑崙
天

空萬里見樓臺憑闌獨憶登高侶城角淒清轉
自哀

賀中丞劉公平海寇詩二首

明堂授鉞自元年萬里身都將相權但見幄中
談俎豆那知天上出樓船主恩特進三臺秩
兵氣全銷百粵天
起屯田

十年閩越羽書飛兩省論兵有是非彊虜千羣
俘馘盡將軍五道凱歌歸折衝秘略傳黃石借

劔高名在瑣闥環海無波胡騎息中興
天子
坐垂衣

漆僉憲以中秘士授御史旋擢閩憲入賀
萬壽時有海壇呂宋雨捷

鬱蔥佳氣滿蓬萊留滯周南太史才獻壽自成
金鑑錄賦詩應滿柏梁臺風清輦路花驄入日
照天池彩鳳來正值樓船連奏凱歌併上萬
年盃

四明李太僕孝甫南游武夷便訪閩府劉

公還朝賦贈

十年曾約武夷游一夕遙乘剡水舟
南國風流爭御李中朝耆舊獨依劉
開尊海月三山出飛檄風煙萬里收
明到金臺如見訊莫言道路有騅騶

萬曆三年連江黃先生蓋九十二歲矣三
月六日其初度也中行自髫年從游邑膠
垂老再謁梓里敬賦進觴云

幔亭霞滿讀書臺猶似春風絳帳開
六觀龍飛

安帝力三逢桃熟見仙才大夫濟上傳經至今
尹關門望氣來闕下舊分雙掌露花前併入萬
年盃

送臨安守昌公致政還閩有序

公自佐吳興而守滇之臨安當督府佳
兵公獨否否輒爲所中當事者附之屬
大計太宰持公吳興有善狀何至臨安
云爾當事不爲白竟不得免焉余爲同
年舊歷滇藩知臨安子民之誦其猶吳

興也且獲商瞿之喜卽歸闕足以慰藉
矣

臥轍滇池父老情擲錢茗水至今清亦知太宰
明難掩無奈孤臣謗易成彈射詎能污白璧止
戈本自爲蒼生請君試讀于公傳誰似高門駟
馬盈

壽曾少叅陽白

懸車薇省未言遲江上蘭蓀結佩時賜有黃金
堪佐酒里稱白雪好裁詩朝從衡嶽看南極春

過高陽倒接羅漢詔祇今徵舊德雲霞向與鹿
門期

送都督俞公赴召京師

封成京觀不言功持節須臾詔漢宮獵騎何曾
與醉尉聖皇先自夢非熊投鞭大海交南盡
借箸甘泉漠北空此處營平堪獻策論兵魏相
正居中

豫章蔡比部數枉騎相過惠示佳什意甚
勤厚賦此謝之

三朝拙宦好誰如一日論交白首餘孺子向慚
高士榻中郎寧少異人書客星萬里來天上劍
氣千秋合斗墟莫怪雲霞詩卷滿君家原自傍
匡廬

沈純甫自嶺南令兄寄至是賦答之

傳書嶺海日相珍握手撫臺喜欲狂自許風謠
齊檣李更聞詞賦擅長楊浮雲不改西山色紫
氣長懸北斗傍同舍故人星散盡白頭猶說舊
爲郎

春日歐楨伯同劉仲修沈純甫劉子大史
元秉康裕卿朱汝修邀黎惟敬及余集李
惟寅宅得袍字

薊門春酒瀉葡萄燕市相逢氣轉豪出入金門
雙彩筆驅馳滄海一綈袍稱詩總是千秋事入
許何知萬里勞東觀西秦俱舊履漢宮休訝客
生高

春日方允治李平美招余同歐楨伯黎惟
敬集城西廣慧寺得無字

莫訝祗園問酒壚十年萍跡限江湖
辭人竝起盟仍在計吏重來興未孤
僧飯且教供苜蓿春
光漸喜到薜蘿不知休沐登臨日
曾憶尊前舊侶無

上巳惟敬送余南還因憶壬戌是日諸君
幸園賦詩送余守汝南迄今二紀星散且
盡憮然興懷口占呈之

馬前春色太蕭條望裏韋園勝事饒
攜手河梁推二子倚歌燕市更三朝
花開上巳猶相似客

散中原不可招回首故鄉殊不遠五湖深計有
漁樵

入計會秘書黎惟敬自南海至

自君海上臥青山東觀風流不可攀劒氣夜看
南斗合金門朝見歲星還中原萬里周旋地華
髮三朝侍從班舊侶祇今歸欲盡寧辭擊筑醉
燕關

次都門戲簡歐楨伯

都門咫尺阻交驩邸舍綈袍雪色寒下榻久知

延孺子嚴城寧爲謝儒官客星帝座如相傍明
月高齋只自看安得元宵仍弛禁開尊燒燭坐
史闌

元日入朝邂逅歐楨伯

奕奕天門旭日升明堂羣吏盡延登廷中入對
慚黃霸殿上橫經讓戴憑寒色乍高金掌露春
風初解玉河冰退朝共賦西山雪猶是江濤壓
廣陵

楨伯惟敬月夜過飲

廿載塵塵一睚難五陵意氣竟誰看
但逢燕市葡萄酒何似江都苜蓿盤
彩筆一揮春雪色明珠雙照夜光寒
倚歌忽憶荆高會未數平原十日驩

雪中方允治歐楨伯李于美載酒郊餞賦別

西山雪色照斜暉授簡離筵得數君
明月乍疑南海至星辰忽自潁川分
漢京玉樹寒相倚郢陽春調不羣
明到欲將雙劒報豐城紫氣坐

氣盛

過維揚周并兄邀余泛舟南郭登覽

水國清和乘興時
同人載酒復如期
池臺倒映千尋動
檻榭平臨四望宜
洛苑名花春後放
廣陵豔舞雨中移
吳歛自有周郎顧
不恨佳人度曲遲

別
計後南還詣崑會元美廷尉旋赴豫章

舣棹滄洲問卜居
揚帆西下復何如
故人雲臥

三江上計吏朝回萬里餘
總為青小憐去住相
看白髮感居諸
尊前娓娓情難盡
不待秋鴻數
寄書

將赴豫章江上逢胡太史

何年供奉下蓬萊
話舊嚴陵江上來
望氣豐城
余乍入探奇禹穴
爾重來
片言難盡
山陰興
六月真逢何朔
孟湧坐天風
堪共賦孤帆
斜日共徘徊

吳明卿自梁罷歸賦寄

前席長沙定有無忽聞季布罷西都梁園頓覺
詞人盡燕市翻驚酒伴孤海內我寧爲碩果山
中君莫賦蘼蕪江潭漁父何勞避幾度滄浪識
左徒

丁丑入都門適戚將軍餉酒歐楨伯郭建
初在坐

緇衣猶自戀絺袍華髮堪憐計吏勞太學先生
分甘惜元戎使者餉葡萄酒經傳六館才寧盡賦
就三都興轉蒙君是郭家諳故事金臺千尺爲

誰高

七言排律

黃河道中別吳生

賦別河梁思不禁。慨然斜日變春陰。艱危未盡
秦庭哭。放逐仍同楚澤吟。風雨北來三輔暗。雲
霞南入九江深。窮塗豈礙垂天翼。散地偏增玩
世心。知己千秋高白雪。論交四海失黃金。相期
後會從藜杖。祇恐名山也陸沈。

賦得貞石贈雲間吳比部十一韻

何來片石挺孤標。閱盡滄桑不動搖。五嶽囊中
爭巖嶠。九峯江上讓名堯。補天已就千秋色。障
海曾回萬里潮。綦置星辰分碧落。鏡懸日月遞
青霄。甘嬰楚則明投璧。恥受秦鞭幻作橋。古冶
自堪成鐵劒。他山猶可治瓊瑤。芙蓉獨秀誰爭
麗。松柏相依也後凋。漱齒清風高百代。觸膚霖
雨徧崇朝。論交萬變心難轉。比介三公勢不撓。
承柱明堂綿玉曆。支機青漢挂冰綃。奇聲賦擲
天台動。王氣書探禹穴遙。審樂正逢吳季札。并

將擊拊和虞韶

奉送太宰楊公西還十九韻

跌蕩天門旭日升縱橫龍變與雲蒸時才五鹿
名虛籍世業三鱣兆有憑啓事朝濡雙掌露齋
心寒映九河冰節宣北斗天喉舌總領文昌

帝股肱抗議外庭推汲黯延賓東閣謝孫弘兩
朝扈聖趨丹禁廿世臨戎老白登魚水明良
方遇合滄桑歲月忽因仍挂冠鄒衍飛霜市迴
駟文王避雨陵安得箏歌明謝傅欲從劒字問

韓稜傾城供帳青霄滿入晉河山紫氣增願命
詎能忘玉儿流言應自感金縢萬邦黎庶思重
起九廟神靈在中興田里本非明主意風雲
行見詔書徵卽看麟閣圖克國會向龍門御李
膺顧盼一朝投白璧蹉跎千里附青蠅匏瓜久
繫翻相笑碩果猶存敢自矜拂袖五噫辭漢闕
抽毫七發愧枚乘出爲小草元無益積似前薪
任見凌誰復黃金收駿骨且將華髮寄魚簪

奉寄清源鄭山人十韻

聊城一別歲頻徂海北天南悵望孤入趙荀卿
稱祭酒如邛卓氏擅當壚林中爽氣生談麈座
上狂歌擊唾壺自度新聲調樂府偶從奇計借
兵符他鄉尺素來千里舊業扁舟傍五湖不盡
壯心驚老驥欲傳玄草屬童烏賈餘轉覺揮毫
健濟勝寧煩賜杖扶寥廓久知身是客飄零惟
與酒爲徒一官愧我同雞肋萬事輸君得鳳雛
更道臥游情不淺因風遙寄武夷圖

天目先生集卷之十 終

天目先生集卷之十一

吳興徐中行子與 著

序

送劉大夫秉卿守常德序

往父老云先歸安令安菴劉公之賢也既已私
心異之又聞其後多賢豪長者願亟見之亡繇
也久之始得從劉大夫秉卿游司寇署中驩然
自恨晚大夫安菴公之孫也大夫法律在司寇
有餘而經術文雅習國家大體不欲繁苛巧詆

蓋庶幾廩廩德禮長者之風矣以故更數司寇
咸喜郎得人云嘉靖辛丑會當遣秋官郎按洗
諸道獄而黔中遠尤重乃屬大夫曰獄一也然
內地卽不當得遂達黔中荒服萬里外雖甚冤
抑能上聞哉乃晝夜竭聰明反覆校爰書無疑
端乃已於是侏僂椎結之衆莫不從縲桎中叩
首

天子大恩而喁喁嚮風矣十二軍帥某亡賴捕
盜賊敵軍功賞乃跡捕株連繫司寇獄也他曹

郎微得狀大司馬輒移書請讓於是請更曹屬
大夫鞫則大司馬猶絮責也大夫曰法本人情
爲也乃以微文入何易哉其首者僅論城旦餘
竝得末減大夫爲郎垂十年更起大小之獄亡
慮數千百章其敬慎哀矜類如此好劉君者謂
當右秩遷矣乃今領一郡又楚遠郡大夫得無
薄之邪余曰不然是乃所以重劉君也予不觀
於天下之勢哉常德固武陵地左洞庭右五溪
扼巴巫據吳會荆楚之樞而咽喉之地也其俗

君子秉禮義，嫺文辭，固斌斌然著天下。小人苦
瘠薄義，又五方雜居，輕悍易動，非久安長治之
國也。日者嘗傾全楚之力，以蹕有苗矣。瘡痍甫
定，而北虜橫起，軍興幾乏。大司農乃遣使者嚴
督江南諸道，逋賦殆竭澤矣。而島夷創吳會，當
事之臣復徵巴蜀兵，倚角而武陵其衝也。芻糈
不適，則債興敢桀，浚脂沫以奉戰士，又恐因緣
殃變也。武陵固重寄哉！且世之以難告大夫者，
大要謂同姓諸侯王南面而孤，與王國官吏其

奉與費難繼也。郵傳絡繹朝奔而夕馳，抱牘踵
告未易縷舉也。而不知夫此特其標末耳。乃若
墉堅而濬深，實甲庾積，知任緩急矣。猶未究其
委也。至於藏之閭閻之間而用之樽俎之上，所
謂脩於不見跡者，又非新進銳意操切者可庶
幾也。銓曹以劉君往，其意固遠哉。余嘗怪史遷
氏述郅都張湯輩，任耳目鈎距中人之陰，若鬼
神固赫然媮快也。至著循吏傳，獨舉孫叔敖數
人，叔敖固楚之令尹也。其罷市令，革庫車，勸樵

采政若拙矣。而國之所賴者。則在此而不在彼也。大夫亦知仲氏致卿君之所以治。檇李者乎。島夷蠶食。且盡而千里無半菽。卽父母不能有其子矣。致卿君卒然調發而子弟操戈。父兄糗糒無不爭先爲太守出死力者。非有他法行也。君盍衽席其民。而湯沐之。令元氣先神采而固。則惇龐篤厚。色澤益如前。所謂標與本者。無不隨至舉矣。卽先楚相所爲。亦何加焉。余又聞君之先多起自郡縣吏。卽無不尸祝者。至於楚又

君之曾大父與太父兄弟之履在焉明德遠矣
楚人固日夜望君至也君毋亦式廓先世之澤
以永甘棠之思則余與二三君子亦藉有寵光
哉

送比部萬章甫先生擢雲南兵備副使序
始余爲司寇郎章甫舍中也則章甫以讞獄之
楚矣日李于鱗與舍居輒抵掌論天下士未有
失也至推第同舍郎則疊疊章甫云章甫初治
他曹年甚少數更起大獄往山東寇挾左道亂

黔首輒操潢池兵徐沛間洶洶矣直指使旣督誅酋首其黨黠者乃繫司寇獄也章甫訊之獄且具而中貴人啖禦人貨數危言屬章甫中貴人要能奇中人章甫不顧曰余不佞屬司寇乃縱大寇哉置諸理又親禁軍至橫厲身禽獸行慝其子誣以不孝坐章甫微得狀當反而大司寇史衛尉請且目攝章甫竟持法不易也于鱗言僅此已心異之及章甫還自楚與余善若素間言楚中囚如衡山獄株連者蓋數十人更數

案益牽畏不得反及覆視爰書郎何異市虎而
縣道官猶堅不欲出然竟出也則章甫楚中事
又多類于鱗言矣章甫爲人廉辯蓋斤斤自好
者其法律在司寇有餘而持論務大體不欲阿
當世故當世亦莫能援芘之然愈益自奮會有
不足意輒語余曰嗟乎士業已倍親而仕當激
昂坐雲臺爲

主上効一二不則從傳介子班仲升立功異域
姓名竹帛間安能鬱鬱俛仰局促事刀筆爲也

於是章甫郎司寇垂十年當遷數矣久之以雲
南兵備副使往章甫才不中州乎乃竟炎徼外
且萬里也雖然今而得竟如夙所語幸甚夫雲
南古滇中地沃野蓋數千里而形勝埒中州亡
論金錫珠璣孔翠犀象寶幪火毳之賦軫積內
府卽山川要害內拱巴渝楚越而外控交趾吐
蕃蓋巋然一重鎮也然蠻夷雜居習桴鼓相仇
殺數爲邊徼難又北虜等耳昔王然于風諭滇
王入朝而諸夷以同姓相仗不聽已而懼伏內

屬則戈船下瀨將軍力也武侯定南中乃因其
率用之不留兵不署吏者豈智不及哉勢則然
矣明興

高皇帝令傅將軍擊走梁王復令沐將軍世填
撫之役恐稍稍翫不任兵乃更設外臺臣分其
地各取便宜從事一有沮格卽假柱後惠文彈
治威服之意甚遠也往歲麗川沅江酋剽戾敢
衆乃亡異呂嘉蒼梧王縣道官不勝憤以兵臨
之猶在犯侵轍雖軍鋒之冠如韓千秋者亦勇

亡所施何邪臺臣某某選與庸墨亡能先事經
略逆折未萌復徼倖嘗敵以損國威重亦積漸
然也彼雖侏僂蠢獷其視利害禍福明矣信能
大畏荒裔之志而制其命何至是哉夫兵刑屬
也漢郅都一健苛吏守鴈門匈奴終其身不敢
近假明允如咎繇而蠻夷猾夏又何竢聽爲卽
有以章甫郎署時事風蠻夷且喁喁然望風馳
義矣夫傳介子班仲升借

天子威靈區區用小武奚足齒章甫也章甫其

思余言。

送左使陳公乞歸錢塘序

陳公將致位客留行者言不得其職則去失時則去有故則去功成則去老則去公起家縣令爲尚書郎歷方岳諸職未嘗有所失曩者二十一年僅循資而轉耳乃今五歲遷者五非得時者哉蓋巖廊避位以儀公久矣輒有去志其故何也夫以公之重雖所至誦功尚未畢公卿之業胡爲中道而棄之矧當臨雍拜老之朝引年

起者未艾年未六十其可稅駕乎公曰否否敬謝客矣雖中丞御史不能強挽之也尋自上書略云臣家錢塘去滇將萬里先年冒暑奔走冀樹尺寸功答明時萬一不幸犬馬病作奉職亡狀填炎荒溝壑無益故敢乞骸骨歸老書下相國相國公同年進士知公雅志遂所請焉去之日萬姓遮道而泣弟子員曰滇昔南宮登第歲一二人而已自公視學既躬倡以道術其經義高等議論條對及書法不稱必程督之兼通乃

授之廩。故爭切劘文藝。比歲登者十人。與中原
埒。公之教也。父老輩曰。公叅藩政已。孳孳務民
和。去而見思不置。爲左右使。益單厥心。米鹽靡
密。精力不遺。受計出記。罔不中其利病。采金貢
象之類。皆所上便宜而罷。夷屬咸得息肩。公之
賜多矣。鄉士大夫曰。公先後八年于茲。禮士大
夫。廩廩如一日焉。寢藩鎮之謀。而匡之以禮。有
功社稷。不在汲長孺下。尤於要害爲保障。計遷
郡邑。復將府。築城郭。增關砦。道路置郵。無不繕

治武侯相蜀不勞於此矣。且也其勞莫甚水洞引龍泉而通橫山鑿石三十里許可溉四萬五千餘畝。自治滇明年經始之六閱月請告不忍亟去者適觀厥成耳。茲歷三年所垂成而去之如此水何願且信宿公潛然踟躕忽報水洞穿矣。萬姓驩呼既而復泣曰是役之艱毋論離確卽龍門伊闕視此何如哉。賴公之誠每旦必禱明神恤之俾少休矣。旣不能留其謀祠之橫山祝公加餐幸再填撫于滇焉去而得民若此有

漢所未嘗覩者也。公行且留言別余而辱稱爲
益友。余豈其人也哉。公弱冠掄魁典禮主客視
學兩藩多聞可知已。所與當路書譽謬有烈士
風論交傾惓惓必效藥石言其直諒尤時所難
云。嗟夫茲公所以去而非客所知也。夫和而不
易其介。櫛下惠至于三黜。仲山甫之補袞闕亦
必周明哲之圖直道之難。自古然矣。公爲遠臣
弗聞遺于中朝。故因以見罷而聞望益重。
聖明更始首薦而起躋之方岳。詎敢懈于夙夜。

哉然進退有經惟公達其權焉爲龍爲蛇與道
卷舒不至三黜以全

主上之恩如麟如鳳抱德遠引保于明哲以見
治世之盛載觀于越范蠡嚴陵旣邈高風幾於
無聞公共翩翩而興者乎余家太湖之西去錢
塘一水耳公歸余留難乎其別矣

送鄧公叅南越藩政序

閩越之有監軍蓋一紀于茲矣辛壬癸甲則有
鄧公公出巴蜀居金陵爲郎署入彭蠡守瑞州

控長江之口，備兵于太倉，遶海而轉，閩越令參
南越藩政，東南便宜知至熟也。客有就越人爲
商其難易之故，南人曰：自趙佗并有甌駝，役屬
萬餘里，興師十萬，踰年乃平。亡諸之屬師未至，
輒罷徙之于江淮，其地爲虛。兩越難易大較然
也。日者島夷入闕，猖獗不過十年，嶺南貪亂，至
今未弭。如牛體體，非斧斤不解，鼓刀而奏，芒刃
必頓，且缺且折。已事可鑑，已故莫難于南越。非
鄧公孰能領此？蓋主爵畫之審矣。閩人曰：昔閩

人孔亟一稟之于國醫藥具而良且在腠理可
治今則隱于血脉腸胃醫藥何有自謂仁恙加
以不宿誠益難矣故護軍者談何容易哉夫愍
隸久亂俟戰而蘇旣脫湯火則厭兵革官吏怵
惕武節不張語不以治將淶而彼以爲過計稍
振之則動搖是直爲此廩廩耳其難一簡師縮
餉而指麾千名將第臥護之何必孫武穰苴若
非子玉而代子文非韓信而毆市人且不宿飽
將何以戰其難二島夷犯境內如隼在墉雖去

來有時善射蔑不中矣南越之寇往歲突入彭
湖據三十六島於琉球尾閭之區逐而遠之是
虎逸而歸之柙也其難三居千其間不兢不綖
借箸而籌拆筮以使部署調度諸將莫不如命
或視學而理俎豆或折獄而獻會馘蓋易易然
惟公優之矣今之南越視昔閩疾不殊公雖未
往如善禁方者能視垣一方人何難之有嚮公
爲畫地所限故寇雖遁而未滅茲不聞風而散
則詰壘而降即使負固能當一鼓哉故在閩越

則閩越重在南越則南越重矧有會師之命公
叅兩越之交以左右援則相仗爲重焉南人得
公亦閩人幸也余曰固然公之習兵猶扁鵲也
邯鄲爲婦人醫雒陽爲老人醫咸陽爲小兒醫
各隨俗而變耳公爲郎工信度爲守賦稱平治
兵猶尙權變閩人以此筴彼非矣庖丁解牛每
至於族見其難爲怵然爲戒視止行遲動刃甚
微豈必體髀而以爲難乎公戰彭湖所條攻勦
之略爲慮已甚深遠茲豈南人所知哉客謝曰

越人固陋幸大夫之言如遇長桑君而飲上池
之水譟然而解滿志善刀之時也余曰嗟乎有
是哉惟鄧公爲然承諸大夫命爰載書以祖公
行

送梁大夫叅議貴州序

大夫昔爲令當閩漳南邊境山海寇所出入最
盤錯難治吳平猖獗于極嶺佐莫府夷其巢穴
又大具戰艦逐之於交趾莫府上狀詔安當閩
用武之邑臣士楚甚有功能宜超遷監司未夫

庶幾緩急可使制下以憂去起而居故治以司團練團練之設閩自大夫始昔監漳南司有二人焉重以大夫勢若鼎立或言今制百里得顧爲保障計毋失莫府期輒奏功不難今方面誠尊重而兵分于各道匪長子帥師一國三公之謂何輒捽失不暇何成功之敢知不佞竊覩大夫隨所試而輒効往歲林道乾寇澎湖海上騷然獨部下完蓋審畫至熟而功能益著閩中保障凡多賴焉茲當報政之期命爲貴州叅議

撫東北境蠻蓋以藩司兼兵事云或言大夫勞
苦功高超遷宜如今時倘然得借閩中吾屬皆
安枕矣既此以練兵著稱奈何遠撫彼夷屬爲
也不佞攝護軍竊知漳南往狀大夫軍功由于
能撫倭寇自擊島夷贖罪使相撈剽而圖之軍
正必亟誅乃戰竟未能撲滅而去議者以撫不
能戰恐以戰嘗我能戰而撫其撫必堅倘如撫
計伺其便縛巨魁而安反側是虎刺于檻隼射
于墉也安用老師費財乘危而驅逋逃于外域

乎。今當荆蜀之交，爲荊要路，以帶脅諸蠻，而
利用撫有日矣。命大夫往爲善撫也。不佞曾游
滇，貴州爲南戶，頗知其故。大夫問焉，不佞聞古
荒服，惟羈縻之而已。所謂羈縻，止其勿逸耳。施
以止觸，非福衡不可。大夫由嶺南來，茲皆名藩
文物之區，間所撫寇雖劇，特福衡以待。鼓刀者
也，彼則世承鬼方，一稟約束，亡幾視越寇可逐
出，竟或知兎逃者不同矣。且其刀耕火種，椎結
侏儻，至陋孰不鄙夷之。肯孳孳用撫，故緩之則

恣睢而使彼爲禍孽。急之則嘯聚而以我爲難。
首調其緩急。便宜曰撫非善羈縻之謂乎。大夫
則曰不敏。未知貴州。百越固所知也。七閩當漢
而虛嶺南朱崖亦棄矣。唐後皆爲名藩。中原其
孰先之矧茲。聖明照臨。薄海莫不尊親。貴州

目

文皇疆理儼然齒于上國。雖謠俗尙雜夷風。業
已喁喁顧化。敬奉君子之教。子而撫之何如也。
安敢以秦而視越。若風馬牛不相及邪。諸大夫

然之不佞謝曰鄙人牛言幸大夫往矣

贈閩藩左伯合溪萬公滿秩序

蓋公自通籍二十八年于茲矣初爲嘉定令廉潔擢節平其訾筭民力饒溢百廢以興當日本內訌未有郭郭禦務多方四郊無壘且帥樓船逐之于島外遂經始于垣審畫便宜長度而無更費未幾召爲比部郎留以竣事屹然金湯之固而寇適至以完其樹保障功甚大爲郎據法守正三年較若畫一嗣以憂去起復故職敗光

祿永秩滿遷蜀叅議分部川南下道其上道有
兵事爲漢邛笮越雋故地不避瘴毒踰大渡河
凡三閱月而安戢之其爲下道立隆昌縣時已
遷浙副使而不遘其行尋轉叅晉藩政督賦念
愍隸之訕爲會計必當配里區如限列轉輸則
移以獻程按察粵西擿伏平亭風裁所屆莫不
稱平尋轉右方伯將履畝均科甫試臨桂縣而
遷留改永寧州度形勝而建置之乃行入閩事
事夙夜匪懈盈縮中幾出納惟允庭無私謁帑

有公美故百辟爲憲無虛歲焉矧旣入觀
宜遷尙以滿秩而請或言其絲蓋有兩端云公
爲令旣著不乘之執簡持斧而陸沈郎署竟從
循資出而有軍功者多由藩臬佐貳而鎮撫聞
府矣公所至誦功當南北亭微擁節鉞其孰先
之顧獨賢以迄于今則積薪之勢然耳公筮仕
初分宜秉軸通速化之塗附離起者甚衆以公
之重如稍通之何論節鎮當翱翔巖廊間矣乃
猶猶然退讓爲高及塗漸塞而久任議行趣駕

以往其將能乎。夫兩端固然而余竊慨公之心
焉。世有負公才智經術率喜高論或爲之先談
踴等以上不難公恂恂長者不欲以此先人一
本之情性而因應以成務此居業之本遜志于
學者深也故凡可從事急病讓夷在所不辭未
嘗旣遷而亟去則積薪不爲嫌趨駕有不屑耳
且令甲滿秩者以其夙夜在公有祿而不遑
將能于王事靡盬則必無忝于所生因爵及其
親而親之賢斯章矣公重講德務以忠孝爲經

承歡祿養僅十餘年而能以光祿贈固傷親之不逮耳古有不以三公易一日之養在禮不忘君則不敢遺祖公滿三年考且廼及其祖爲親光寵幸甚誠不以三公與易矣臣子盛節孰大于是哉故惟

帝心簡在不待親見質言而嘉乃丕績遙及之矣爲茲圖報曷其有極幸際元良負展三事股肱咸良倘南北有事藩臬大夫足稱任使若求天下長者可爲社稷臣贊 坤默干密勿精

一心以承休德寧不於公引重乎且日召至而
居巖廊之上矣豈尙遲遲若兩端云爾者邪諸
大夫以閩中寮佐獨余濡滯如公蓋後公通籍
三年茲乃叅公鴈行每自歎亡狀安能及萬一
公尙三年淹余固憮然安之今知公若此則公
信不遲遲矣乃以余言爲公贈焉

壽左司馬新都汪公序

新都汪公正月稱觴于封大夫二月稱觴于太
恭人爲生辰也公生在季冬其歲有又月今者

如之而當稱艾。諸子考卜辰則協吉。閏乃餘慶。其壽未有艾。將從諸叔請于大父母。願亦稱觴以修我世壽。云。諸大夫聞之曰。夫公自強仕巍然列于國卿。今之經營賢勞。詩謂嘉我耄老者也。在禮者始壽事父母。不稱老艾而壽之實惟其慶。且未錫類而孝子不匱。卽爲封大夫太恭人壽也。蓋必得所請。公敢不拜嘉。况其德茂于古昔。言垂于春秋。而所爲壽者。豈耄耄期頤之云乎。將具觴旅進中行。不能從焉。適蒞使者將

都護戚君命曰。摠紳先生將于司馬門。壽汪公
酌者之辭。蓋盈庭矣。繼光武人。安能爲辭。第念
公功高方有事軍旅。幸久從行。聞敢竊有請焉。
公初爲義烏令。江南久承平。雖孳孳務民和業。
已教之知方矣。遷司馬郎。卽有巡功視師之役。
餘力且修文業。而翩翩于諸郎間。比守襄陽。臥
治而已。屬討夷兵興。以副使備閩中。繼光自浙
奉檄率義烏子弟當平其邊鄙。公以所部逆軍
吏子弟踊躍而平之。公躬再請于浙他部所陷。

郡邑以復皆義烏之旅爭應募而効于公也。尋以按察使護軍遷都御史。開府蕩平山海寇。逐嶺南逋逃于交趾。實再造有閩而貽千百世之安焉。公歸繼光召守匈奴往。公受筴爲畫邊事甚具。亡何公以薦起。楚歷鄖關夏門兩鎮務隱武事。以文雅飭吏治。乃召爲右司馬。蓋修閩功也。時大閱禮成。嗣遣三司馬代相國行邊。公領近京諸塞。凡四鎮五千里。軍馭承平弛且久。公先于薊簡將吏行伍核功罪。明賞罰。車騎

徒步游闕間。謀芻粟器械。亭障烽燧之屬。固不
中機宜。制府而下咸服。邊人大悅。他鎮如之。昌
平則衛陵寢。遼東則拓境土。保定則增臺隍。
各因便宜爲保障計。條上畫冊。薊凡十有六。他
鎮有差。皆善後上務也。而後士馬譟騰。疆圉寧
謐。京畿陵寢以重。而奠萬世之休。自開
國于今。皇皇乎其獨爲烈哉。昔漢有高平任計。
管平方略。而振旅唐以晉國視師。沛國專制而
成功。繼光何知。幸免于席藁。實受公賜。敢不爲

公壽中行敬對曰如戚將軍言公于生靈社稷
當食其報未艾匪直公之慶云爾也周方叔爲
元老伐玃狁而威蠻荆吉甫受祉于鎬以之飲
御諸友召虎錫祉于淮以之對揚王休歌于二
雅洋洋乎盛哉公之壯猶如元老也久矣幸際
明良軼周室而陋漢唐歸晉左司馬其爲祉也
繁矣肆惟

世宗十五龍飛在位四十五年公于四年應運
生仕將二十年壽考所作亦孔之固再召于

穆宗是事我

皇上冲齡卜曆受命彌長如月之恒如日之升
臣工依憑日月之光孰不祝照臨于無疆三壽
作朋如岡如陵則飲御燕喜當俾輯熙于純嘏
中行小臣敢藉國家寵靈爲公壽幸語將軍
行觴則歌周雅使者敬諾以行適對揚
天子萬壽之期也

壽叅知斗山樊公六十序

往不佞守汀樊公適按閩首推轂及之竊感激

心計當有贈言以酬國士知後邂逅長安樊公
以爲請時不佞左遷長蘆未能也今

上丙子公春秋六十矣十二月十八日則覽揆
之辰也不佞按察閩中則公寓書姻家鄭從事
甲前命惟不佞許公言垂二十年所矣舊諾未
踐慙然爲愧今公且杖于鄉倘修酌者之詞附
左右爲驩甚幸惡得以不腆辭公自起家行人
以風幹擢南臺已改而北巡北邊京輔要地多
貴人不可問公持斧斤斤按漢六條振飭之吏

有望風解去者所部聞然已又改闕部吏輒相
戒謂是故嘗按比邊者也往使者行部有司具
騶從供帳甚都守令越境送迎甚夥勞費不訾
民甚苦之公先期戒郡邑一切停罷行縣僅一
單車從書史數人而已歲省費數萬緡島夷寇
瀕海諸郡汀邵赤子阻山弄兵大中丞暨諸將
率擁客兵鍵城門自守不發一鏃公慨然曰臣
奉 璽書于境外苟利社稷專之可也山海寇
方釐毒而在事者恬不爲省如元元何中丞公

聞投袂起視師諸將始厲氣決戰烏夷就殲而
不佞守江任健令徐甫宰勦撫并用境內亦清
皆公授策也公爲政精敏發擿如神然重在官
邪及豪強兼并令細民得職耳部內占僧田者
悉繩而還之寺所至墨吏輒令簿對沒贓褫職
而延郡二守要路肺腑親也延守以分宜故尤
橫然每入謁公仍不爲禮竟先後解綬去故事
南臺論列者卽無當外臺無敢違異而閩王僉
憲時槐盧晉江佃二人故清彊吏也以請託故

見嫌閩人南臺疏濫及之公發憤執奏竟得釋
海內愈益多公而閩人自是有郤矣當是時大
墨操國未方以苞苴爲政諸道問遺趾錯于塗
而公獨簡伉不修問長安中不佞二三兄弟獨
尚之然甘黨亦陸沈郎署中至泯泯矣公輒伏
歎曰豈可以當吾世而失諸君哉乃客禮順德
守李于鱗屬吏中王元美讞獄大名游從甚驩
山人謝茂秦客燕旦夕造請定布衣交在閩宗
子相始終厚遇罷市日卽檄所屬奉祠而不佞

守汧當兵衝每畫便事輒報可比按汧畢語不
佞曰世恒薄文士鮮實用乃今祭諸君治行豈
其然乎公天性倜儻豪邁疏通法律而經術有
餘天下事無不可爲者然竟見嗤當世以常調
序遷僅以一叅知罷海內不無少望而公由由
然安之無悔也漢汲長孺伉厲守高咸謂賁育
莫奪及乘居郡猶嗟積薪公還天都巖居川觀
超然遐舉夙昔事不啻蟬蛻去之四丈夫子鷹
行儒林今且旅進舞班仙仙乎天都若殊庭焉

視長孺殆猶賢矣余再入閭日月悠邈而耆紳
父老誦說流風遺愛奕奕若旦莫則公之所不
朽者詎獨齡算而已邪不佞長公一歲而德薄
才下無尺寸表見去公遠甚乃竊竊然以不腆
之辭爲壽其何以稱國士鄭君往矣幸謝樊公
不佞行且挂冠武夷操杖屨從游天都矣

奉賀白川劉公擢南都大司空序

今夫金陵江漢朝宗地也嘗觀之若河洛而思
禹蹟云蓋禹治江漢作貢不但河洛爲然若其

平有苗舞干羽政在岳牧爰及有夏萬世咸仰
其神乃因土功而追思之則司空之永賴者而
于今爲烈云爾

高皇帝取朝宗而都金陵其時天昧之初也萬
雉庶府責在司空自爲留都之後則是職豈惟
艱哉多以雅望居之以備循資而轉者耳若比
海劉公資望重中朝宜侍輦轂以當煩劇
之任乃暫解薊遼昌保兵務而往留都且居司
空奚以爲也以乃

天子明作旦夕將續禹蹟而已咨爾司馬膚公
既奏四鎮千羽萬舞千庭惟茲漕運轉之江漢
爾往圖之行且召矣某窺竊

聖意所以試公者如此適薊戚都護辱使命不
安以言爲公祖行而得公四鎮封事纚纚數十
萬言皆填撫經略便宜言兵什之八九而考工
第一二耳茲任司空且述往揆夫薊禍惜于嘉
靖公初爲戶郎轉轂以奇計用車免難嗣以非
慝副使赴援知薊形制宜車撫薊則倣秦小戎

及漢武剛而曲盡其度乃始有輜重于全鎮且以境垣不足以禦侮必設重險厚埤而表裏爲睥睨虜出入皆可拒戰高其臺櫓而密布之以居戍卒爲萬全策乃始有堅城于沿邊運道自通州以舟達牛欄山距密雲之開府而軍實困于陸轉公則爲堤以障潮白二河合流抱城躬放舟而試之俾漕直抵入城下軍驩騰而得利總府爰始有漕運之便矣茲三者工之鉅博者也若夫器械之末皆盡中國長技豈但以簡

將籌兵而寒旃裘之膽乎哉晉任計者用五以富國而餘自用以致鉅萬鎰不得盡試故必見其所長耳公自筮仕至爲制府二十餘年凡十餘任以兵事聞海內而他所長未盡試

聖明簡在俾盡之于國司空用是申命而豈久稽于留都乎哉公往留都適宣廟垣宇當興大工舉百年廢墜又上言開膠萊河可濟漕之所不及以戎政府召公而廷議河事俾公往試因慮始協濟之艱始罷工以圖再舉焉

上竟是其言以不爲罔功復召還戎政府某嗣以覲至敬修朝宗之職薊使中要前言而因問以河事都護竟謂是工當成則庶幾大禹之蹟哉然則不佞所竊窺

聖意者亦得其萬分之一乎故遲遲而言以奉執事財擇昔者禹工蓋非一朝一夕之故矣